

## KHUTBAH JUMAAT

“KELUARGA MALAYSIA TEGUH BERSAMA”  
(02 September 2022M/ 05 Safar 1444H)

---

الْحَمْدُ لِلَّهِ، الْحَمْدُ لِلَّهِ الْغَنِيِّ الْحَمِيدِ. أَشْهَدُ أَنْ لَا إِلَهَ إِلَّا اللَّهُ  
وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.  
اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ  
مُسْلِمُونَ.

### **Muslimin yang dirahmati Allah,**

Marilah kita bersama-sama meningkatkan ketakwaan kepada Allah *subhanahu wata'ala* dengan bersungguh-sungguh melaksanakan perintah-Nya dan meninggalkan segala larangan-Nya. Mudah-mudahan kita dikurniakan kejayaan yang hakiki di dunia dan di akhirat. Pada hari ini, mimbar akan membicarakan khutbah yang bertajuk “**Keluarga Malaysia Teguh Bersama**”.

### **Kaum muslimin yang dirahmati Allah,**

Malaysia merupakan sebuah negara yang sangat unik. Kekuatan dan keharmoniangannya dibina atas kepelbagaian agama dan bangsa. Sejak Persekutuan Tanah Melayu mencapai kemerdekaan pada 31 Ogos 1957 dan diikuti dengan pembentukan Malaysia bersama Sarawak dan Sabah pada 16 September 1963, kita telah meniti jalur masa yang penuh dengan rencam dan ragam, sama ada suka dan duka. Perjalanan ini pastinya mematangkan semangat

perpaduan dan kebersamaan dalam seluruh anggota masyarakat yang berbilang kaum dan akhirnya mewujudkan suasana kekeluargaan antara sesama masyarakat. Alhamdulillah, hasil kebersamaan dalam membina Negara Malaysia ini, kita semua tetap teguh bersama sungguhpun adakalanya badai datang menjengah.

Inilah tujuan penciptaan manusia yang pelbagai supaya kita dapat saling mengenali dan melengkapi antara satu sama lain. Firman Allah *subhanahu wata'ala* dalam Surah al-Hujurat, ayat 13:

يَأَيُّهَا النَّاسُ إِنَّا خَلَقْنَاكُمْ مِنْ ذَكَرٍ وَأُنْثَىٰ وَجَعَلْنَاكُمْ شُعُوبًا وَقَبَائِلَ لِتَعَارَفُوا إِنَّ أَكْرَمَكُمْ عِنْدَ اللَّهِ أَتَقَىٰكُمْ إِنَّ اللَّهَ عَلِيمٌ خَبِيرٌ ﴿١٣﴾

**Maksudnya:** *Wahai umat manusia! Sesungguhnya Kami telah menciptakan kamu dari lelaki dan perempuan, dan Kami telah menjadikan kamu pelbagai bangsa dan bersuku puak, supaya kamu berkenal-kenalan (dan beramah mesra antara satu dengan yang lain). Sesungguhnya semulia-mulia kamu di sisi Allah ialah orang yang lebih takwanya antara kamu, (bukan yang lebih keturunan atau bangsanya). Sesungguhnya Allah Maha Mengetahui, lagi Maha Mendalam Pengetahuan-Nya (akan keadaan dan amalan kamu).*

**Kaum muslimin yang dirahmati Allah,**

Dalam membina sebuah negara yang aman, makmur dan berjaya, pastinya ia memerlukan usaha sama yang bersepadu daripada

seluruh anggota masyarakat. Peranan penting daripada Ketua Negara sehinggalah kepada anak kecil menjadi pemacu kepada keberhasilan setiap dasar dan perancangan yang diatur oleh kerajaan. Diibaratkan sebuah keluarga, tiap-tiap ahli keluarga berperanan atas tanggungjawab masing-masing memastikan kecukupan, kebahagiaan, dan keselamatan keluarga terjamin dan terpelihara. Begitulah juga Konsep 'Keluarga Malaysia' yang berdiri atas tiga teras utama iaitu keterangkuman, kebersamaan, dan kesyukuran.

Bagi memenuhi ketiga-tiga teras ini, ia memerlukan kepada; **Pertama:** Penyemaian budaya integriti dalam keluarga; **Kedua:** Menjadikan budaya amanah sebagai budaya keluarga; **Ketiga:** Menjadikan prinsip keadilan sebagai teras pengukuhan keluarga, dan; **Keempat:** Menjadikan amalan bermusyawarah sebagai amalan keluarga.

Bersandarkan konsep 'Keluarga Malaysia' ini, negara akan dipacu untuk keluar daripada kemelut krisis kesihatan, ekonomi, pendidikan, dan lain-lain lagi seterusnya menjamin kesejahteraan setiap penduduk di negara bertuah ini. Keteguhan dan kebersamaan seluruh rakyat tanpa mengira perbezaan agama, bangsa, fahaman politik menjadi kunci kepada keberhasilan dan kejayaan perancangan dalam usaha memulihkan dan membina semula kekuatan negara. Manakala bagi kita umat Islam pula, pastinya, ketakwaan dan keimanan kepada Allah *subhanahu wata'ala* menjadi senjata paling utama dalam kita menjemput

rahmat dan keberkatan dari Allah *subhanahu wata'ala*.

### **Kaum muslimin yang dirahmati Allah,**

Nikmat kemerdekaan ini patut diisi dengan kesyukuran dan kepatuhan kepada perintah Allah *subhanahu wata'ala*. Ketaatan kepada Allah *subhanahu wata'ala* dan pelaksanaan *amar ma'ruf* dan *nahi munkar* dalam negara inilah yang menjadi kunci kepada berkatnya dan hadirnya pertolongan Allah *subhanahu wata'ala* sebagaimana janji-Nya yang dirakamkan dalam Surah al-Hajj, ayat 41:

الَّذِينَ إِن مَّكَّنَّاهُمْ فِي الْأَرْضِ أَقَامُوا الصَّلَاةَ وَآتَوُا الزَّكَاةَ وَأَمَرُوا بِالْمَعْرُوفِ  
وَنَهَوْا عَنِ الْمُنْكَرِ ۗ وَاللَّهُ عَاقِبَةُ الْأُمُورِ ﴿٤١﴾

**Maksudnya:** *laitu mereka (umat Islam) yang jika Kami berikan mereka kekuasaan memerintah di bumi nescaya mereka mendirikan sembahyang serta memberi zakat, dan mereka menyuruh berbuat kebaikan serta melarang dari melakukan kejahatan dan perkara yang mungkar. Dan (ingatlah) bagi Allah jualah kesudahan segala urusan.*

Maka, tidak dapat tidak, nikmat kemerdekaan yang dikecapi ini wajib dipertahankan oleh segenap lapisan masyarakat. Semangat cintakan negara perlu disemai dan dibaja ke dalam diri anak-anak agar kesinambungan keharmonian dan kemakmuran negara ini dapat diperturunkan kepada anak cucu kita nanti. Ini tanah tumpah darah kita. Tempat kita sama-sama membesar, belajar, bermain,

mencari nafkah dan sebagainya. Jika bukan kita yang menjaganya, kepada siapa lagi yang hendak kita harapkan? Rasulullah *sallallahu alaihi wasallam* juga begitu cintakan tanah airnya, iaitu Kota Mekah sebagaimana dapat dilihat dari ungkapan kerinduan Baginda *sallallahu alaihi wasallam* terhadap tanah tumpah darahnya itu:

((وَاللَّهِ إِنَّكَ لَخَيْرُ أَرْضِ اللَّهِ وَأَحَبُّ أَرْضِ اللَّهِ إِلَيَّ وَاللَّهُ وَلِيٌّ لِّأَنَّي  
أُخْرِجْتُ مِنْكَ مَا خَرَجْتُ))

**Maksudnya:** *Demi Allah! Sesungguhnya kamu (Kota Makkah) adalah sebaik-baik tanah Allah, dan tanah yang paling dicintai oleh Allah, seandainya aku tidak diusir darimu, nescaya aku tidak akan keluar (darimu).*

*(Hadis riwayat Imam al-Tirmizi)*

Kecintaan Baginda *sallallahu alaihi wasallam* dan para sahabat *radiallahu anhum* terhadap negara juga dapat diteladani daripada kesungguhan mereka mempertahankannya dalam setiap peperangan dan usaha pengembangan dakwah Islamiyah.

Justeru, inilah contoh teladan yang telah ditunjukkan oleh Baginda Rasulullah *sallallahu alaihi wasallam* dalam mencintai tanah air. Kita di Malaysia pula perlu terus kukuh, saling membantu dan saling menghormati supaya kerukunan hidup dapat dipelihara dan mewujudkan sebuah negara yang stabil dan teguh. Landskap keharmonian yang dinikmati ketika ini jangan dirobek dengan sebarang provokasi. Bersama kita mempertahankan kedaulatan

negara dari sebarang usaha yang memecahbelahkan perpaduan dan keharmonian ini.

**Kaum muslimin yang dirahmati Allah,**

Mengakhiri khutbah pada hari ini, khatib ingin merumuskan khutbah kepada beberapa intipati:

**Pertama:** Sepanjang kemerdekaan negara ini, kita telah melalui pelbagai rencam dan ragam yang pastinya mematangkan semangat perpaduan dan kebersamaan dalam seluruh anggota masyarakat. Maka kematangan ini perlu diteruskan sampai bila-bila.

**Kedua:** Konsep 'Keluarga Malaysia' yang berdiri atas tiga teras utama iaitu keterangkuman, kebersamaan, dan kesyukuran, merupakan suatu pendekatan yang sangat hampir kepada kita dalam usaha menstabilkan dan membina kekuatan negara. Ketaatan kepada Allah *subhanahu wata'ala* dan pelaksanaan amar ma'ruf dan nahi munkar menjadi kunci kepada keberkatan dan pertolongan Allah *subhanahu wata'ala*.

**Ketiga:** Semangat cintakan negara juga telah ditunjukkan oleh Rasulullah *sallallahu alaihi wasallam*. Maka, sebagai umat Islam, inilah salah satu sunnah yang mesti dituruti dalam usaha pengembangan dakwah Islamiyah dan padanya juga berhubung kait dengan pemeliharaan Maqasid al-Syariah iaitu menjaga agama, nyawa, akal, keturunan, dan harta.

Akhirnya, marilah kita bersama-sama menghayati firman Allah *subhanahu wata'ala* dalam surah al-A'raaf, ayat 96:

أَعُوذُ بِاللَّهِ مِنَ الشَّيْطَانِ الرَّجِيمِ. بِسْمِ اللَّهِ الرَّحْمَنِ الرَّحِيمِ  
وَلَوْ أَنَّ أَهْلَ الْقُرَىٰ ءَامَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ وَالْأَرْضِ  
وَلَٰكِن كَذَّبُوا فَأَخَذْنَاهُم بِمَا كَانُوا يَكْسِبُونَ ﴿٩٦﴾

**Maksudnya:** *Dan (Tuhan berfirman lagi): Sekiranya penduduk negeri itu, beriman serta bertakwa, tentulah Kami akan membuka kepada mereka (pintu pengurniaan) yang melimpah-limpah berkatnya, dari langit dan bumi. Tetapi mereka mendustakan (Rasul Kami), lalu Kami timpakan mereka dengan azab seksa disebabkan apa yang mereka telah usahakan.*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ  
الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ  
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ  
الْغَفُورُ الرَّحِيمُ.

## KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ  
وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ  
صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا  
بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ لَعَلَّكُمْ تُفْلِحُونَ.

### **Kaum Muslimin yang dirahmati Allah,**

Perlu diingatkan bahawa kita masih lagi berhadapan dengan wabak COVID-19. Walaupun pelbagai kelonggaran telah diberikan, mimbar terus menyeru agar kita terus berwaspada dan melakukan kawalan sendiri dengan sebaik-baiknya bagi mengelakkan terdedah kepada bahaya wabak penyakit kerana mencegah itu lebih baik daripada mengubati. Pada masa yang sama, teruskanlah memohon keampunan serta bermunajat kepada Allah *subhanahu wata'ala* agar diangkat segala wabak dan musibah daripada kita dan dikurniakan keselamatan dan kesejahteraan buat diri, keluarga, masyarakat, negeri dan negara.

قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ

وَسَلِّمُوا تَسْلِيمًا



اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ  
عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا  
مُحَمَّدٍ وَعَلَى آلِ سَيِّدِنَا مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ  
وَعَلَى آلِ سَيِّدِنَا إِبْرَاهِيمَ، فِي الْعَالَمِينَ، إِنَّكَ حَمِيدٌ مَجِيدٌ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ  
مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ يَا قَاضِيَ  
الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah ! Kurniakanlah kami rezeki yang halal lagi diberkati, hindarilah kami dari sebarang bentuk gejala rasuah dan pelanggaran kepada peraturan dan undang-undang. Kurniakanlah keselamatan dan kesejahteraan, jadikanlah kami ummah yang

berkualiti dan berintegriti demi mencapai negara yang aman dan makmur serta mendapat perlindungan Allah *subhanahu wata'ala*.

Ya Allah, Ya Dzal Jalali Wal Ikram! Kabulkanlah doa kami. Terimalah segala amal ibadah dan ketaatan kami kepada-Mu. Ya Allah, kukuhkanlah perpaduan dan kesatuan kami dalam aqidah, ibadah dan akhlak di bawah pegangan Ahli Sunnah Wal Jamaah. Jadikanlah diri kami, isteri-isteri kami dan keturunan kami dari kalangan yang mendirikan solat serta menjauhi dosa-dosa kecil apatah lagi dosa-dosa yang besar. Limpahkanlah ke atas kami nikmat kesihatan dan keafiatan. Kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit, khususnya wabak COVID 19.

اللَّهُمَّ اشْفِنَا وَاشْفِ مَرَضَانَا وَمَرْضَى الْمُسْلِمِينَ، اللَّهُمَّ اجْعَلْهُ طَهُورًا  
لَهُمْ، وَارْفَعْ مَنْزِلَتَهُمْ، وَأَبْدِلْهُمْ مِنْ بَعْدِ الْمَرَضِ صِحَّةً، وَمِنْ بَعْدِ  
الْبَلَاءِ عَافِيَةً.

اللَّهُمَّ ارْحَمْ مَوْتَانَا وَمَوْتَى الْمُسْلِمِينَ، اللَّهُمَّ اغْفِرْ لَهُمْ وَارْحَمْهُمْ،  
وَعَافِهِمْ وَاعْفُ عَنْهُمْ. رَبَّنَا أَتْنَا فِي الدُّنْيَا حَسَنَةً وَفِي الْآخِرَةِ حَسَنَةً  
وَقْنَا عَذَابَ النَّارِ. أَمِينَ، أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ  
عَنِ الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ  
الْعَظِيمَ يَذْكُرْكُمْ. وَاشْكُرُوهُ عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ  
يُعْطِكُمْ. وَلَذِكْرُ اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.